



Communicaziun a las medias

Data: 23 da november 2021

Novs examens da lingua en rumantsch

Dapi ils 20 da november 2021 vegnan fatgs examens da lingua er en rumantsch. Ils examens da rumantsch èn vegnids sviluppads per incumbensa dal Secretariat da stadi per migraziun (SEM).

Persunas che vivan en Svizra e che dumondan ina permissiun da dimora u da domicil ubain che vulan sa laschar natiralisar ston cumprovar ch'ellas han emprendì ina lingua naziunala. Per quai pon ellas far il test fide ch'è vegnì sviluppà per incumbensa dal SEM en tudestg, en franzos u en talian. Er examens da lingua d'auters purschiders che correspundan als criteris generals da qualitat èn reconuschids per las proceduras dal dretg da personas estras e dal dretg da burgais. Fin qua na devi nagin examen en rumantsch, la quarta lingua naziunala – ni in examen ch'è vegnì sviluppà da la Confederaziun, ni in examen reconuschì ch'è disponibel sin il martgà liber.

En collavuraziun cun il post d'administraziun fide, cun l'Uffizi da migraziun dal chantun Grischun e cun la Lia Rumantscha ha il SEM laschà sviluppar – en il rom dal sistem fide – ils examens da rumantsch. Uschia pon persunas che vivan en vischnancas grischunas, nua ch'i vegn discurrì rumantsch, cumprovar ussa lur cumpetenzas linguisticas en rumantsch. Ils examens da rumantsch stattan a disposiziun en ils idioms sursilvan, sutsilvan, surmiran, puter e vallader sco er en rumantsch grischun. Els han lieu duas giadas l'onn a Cuir, las datas vegnan publicadas sin la pagina d'internet dal post d'administraziun fide. Dapi l'onn 2017 è il post d'administraziun fide responsabel – per incumbensa dal SEM – per la garanzia da qualitat en la promoziun da la lingua e tar la cumprova da las cumpetenzas linguisticas.

Contact/dumondas:

Infurmaziun e communicaziun SEM, medien@sem.admin.ch

[Examens da rumantsch](#)

